



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Tribunál Distritál Suai
05 Dezembru 2013

Tribunál Distritál Suai kondena arguidu ba krime tentativa omisídiu ho natureza violénsi doméstika no inséndiu ho pena prizaun tinan 12

Iha 04 Dezembru 2013, Tribunál Distritál Suai kondena arguidu JJ ho pena tinan 12 tanba provadu prátika krime tentativa omisídiu hasoru nia feen no krime inséndiu iha 29 Maiu 2013 iha Distritu Suai.

Ministériu Públiku akuza katak iha 29 Maiu 2013 kalan, arguidu lori katana taa iha vítima nia kabas no iha liman fuan dala rua. Aleinde ne'e arguidu mós lori mina rai fakar iha uma laran no sunu sira nia uma. Aktu rezulta vítima nia liman fuan rua la-funsiona normal hanesan bai-bain.

Relasiona ho krime rua ne'e, Ministériu Públiku akuza arguidu kontra artigu 23 Kódigu Penál kona-ba tentativa omisídiu no artigu 263 Kódigu Penál kona-ba inséndiu.

“JSMP kontinua rejista komitmentu no seriedade instituisaun judisiáriu atraves husi atribuisaun pena ne'ebé apropriadu ba autór violénsia doméstika sira tuir krime ida-idak nia natureza no gravidade. Ne'e progresu boot tebes iha ita nia sistema justisa formal, tanba violénsia doméstika nu'udar krime ne'ebé sériu dalabarak produz implikasaun psikolojiku ne'ebé todan ba vítima sira,” dehan Diretór ezekutivu JSMP Luis de Oliveira Sampaio.

Iha audiénsia julgamentu arguidu konfesa totalmente ba faktus hotu no hatudu nia arependementu no deklarata katak sira dame malu ona liu husi tradisaun familia nian. Faktu ne'e mos reforsa liu tan husi vítima.

Bazeia ba faktu no sirkunstansia atenuantes hirak ne'e, tribunál konklui hodi kondena agruidu ho pena prizaun tinan 12, tuir alegasaun finál husi Ministériu Públiku.

Pena prizaun tinan 12 nu'udar akumulasaun husi krime tentativa omisídiu ne'ebé kondena ho tinan 5 prizaun no insendiu kondena ho tinan 9 prizaun ne'ebé tuir lolos tenke hetan tinan 14 prizaun. Maibe tribunál konklui ho pena prizaun tinan 12, tanba arguidu kolabora ho tribunal, arepende nia hahalok no promote sei la halo iha futuru.

Kazu ida ne'e rejista ho Númeru Prosesu: 217/PEN/2013 TDS. Prosesu julgamentu deriji husi Dr. Costâncio Barros Basmerly, Ministériu Públiku representa husi Dr. Felismino Garcia Cardoso no arguidu hetan akompañamentu husi Dr. Manuel Amaral (estajiadu) husi Defensoria Públiku.

Atu hetan informasaun kle'an liután favór kontaktu:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
info@jsmp.minihub.org
Telefone: 3323883 | 77295795
Website: www.jsmp.tl